

24 Obijcies ex D. Thoma in primo suæ physicae libro, air, obiectum physiologiae esse ens mobile; ergo falsa conclusio.

Respondeo venerando D. Thomã, quod si pro ente mobili intelligit elemēta, admitto eius doctrinã; si intelligit vt eius sequaces intelligunt, iam patet ex dictis responsio.

S V B S E C T I O V.

Meam de obiecto physicae sententiam prefero.

FVit apud antiquos institutum, & præcipuè apud Pythagoricos, sequi magistri sententiam, quod multi faciunt etiam nostri temporis gratiæ causa; ego numquam contra meos magistros egi, quorum doctrinam optimam consideravi semper; at quia non amplius in ætate pupillari maneo, pro meo libito ingenium meum veritati applicare intendo; sit

25 Vnica conclusio. obiectum physicae sunt elementa, quatenus dicunt amicitiam, vel inimicitiam ad inuicem, vel sunt in pace, aut odio.

26 Loquor hic de obiecto adæquato in rigore, vtpote conflatum ex materiali & formali, cum omnibus suis partibus.

27 Probo conclusionem ratione vnica fundamentali. illud est obiectum alicuius scientiæ adæquatum, ex materiali, & formali, de quo verificantur omnia prædicata, quæ in illa scientia tractantur, & ita dicta tractantur ab illa scientia, vt sub tali formalitate ab alijs scientijs non considerentur; sed elementa huiusmodi se habent; ergo &c. elementa prout amicitiam, vel inimicitiam dicunt, vel in pace, aut odio sunt, obiectum adæquatum in rigore dicenda sunt respectu huius physice scientiæ. maior iam firmata fuit a me in logica cum de eius obiecto egi, & apud ceteros scribentes non remanet dubiosa; minor, quæ duas partes habet, iam nunc probo quo ad primam partem, principia namque physicalia, & passiones sunt perfectibile, perfectium, natura, motus, quies, terminus a quo, ad quem, causa, effectus, generatio, corruptio, locus, tempus, mixtio simplicium, compositum; sed hæc omnia verificantur de elementis modo supra dicto acceptis; ergo elementa prout habent an inuicem amicitiam, vel inimicitiam &c. sunt obiectum adæquatum in rigore huius scientiæ physice. quo ad secundam partem etiam patet,